

Ƙapiya Sën Paulus Kevu Netu Luu Vu Kerisi-yi- alam Vu Tesalonika

1 ¹ Sa Paulus geSilvanus* luho Timoti, balöö nekevu ƙapiya sënë vu ham sën ham tu hil Amad Anutu luho Mehöböp Yesu Kerisi hir alam vu Tesalonika lo. ² Hil Amad Anutu luho Mehöböp Yesu Kerisi degevonġ hir semusemu vu ham bedegevonġ beham ayomin ġep revuh.

Alam Tesalonika Denare Niwëëk

³ Arig lo, huk sënë negġep vu he raġ buk pin bë he kwamin vesa vu Anutu in ham. In ham ayomin neya timu vu yi rot beniwëëk raġ, lom ham nesepa loġ bahëmin neving ham rot beya meniwëëk raġ. ⁴ Yiġ nebë sënë, om sën he nehako ham raġ vu Anutu-yi-alam vahi pin. In ham töġ vu maggin rot benekwerë vanë böpata, rëġ ham nare niwëëk bayomin neya timu vu Yesu.

Anutu Neseggi Hil Niröp

⁵ Lob vanë sën ham nekwerë gwëbeng agi, og sënë tato vu hil bë Anutu nevonġ nġaa pin niröp, in maggin sënë nevonġ beham yoh vu bë rëġ na medo Anutu yi nyëġ. ⁶ Lob Anutu nevonġ huk niröp mu, om nahub rë loġ mëm rëġ bo maggin vu alam sën denevo maggin vu ham gwëbeng agi. ⁷ Log Anutu rëġ geġo ham vër in nġaa maggin sën ham nekwerë gwëbeng agi, geham rëġ medo nivesa geving he doġ buk sën Mehöböp Yesu duġ nom vu yaġek geving yi angër niwëëk lo lo. ⁸ Yesu rëġ duġ nom los nengwah daggen böpata in gevonġ nyëvewen vu alam sën su denegġurek Anutu babu rë, gedeneruuk hil Mehöböp Yesu yi Bengö Nivesa ya lo. ⁹ Lob hir nyëvewen sënë nebë: Demedo nenga in Anutu doġ Nyëġ Nipaya degwata los degwata. Su deyoh vu bë demedo geving Mehöböp rë, gesu rëġ malaj jaġ yi nabë yi Mehö niwëëk los bengö ¹⁰ doġ buk sën duġ nom lo rë. Gaġ Anutu-yi-alam, og rëġ degeġo yi jaġ rot kesuu, galam pin sën ayoj neya timu vu yi lo og rëġ degelë yi medenapisek in. Lob yiġ ham og ham ayomin neya timu vu yi vorot raġ ġaġek sën he nër vu ham lo.

Paulus Jom Raḵ Ya Vu Anutu Bě Ġadu Alam Tesalonika Niwëëk

¹¹Yiḵ nebë sënë, om he medo najom raḵ ya vu Anutu yoh vu buk bë: Ggoin ham raḵ tu yi alam, om doḵ vu ham beham sepa doḵ yi niröp. Ham nevonḡ ving yi om bo niwëëk vu ham in huk sën ham nevonḡ los nḡaa nivesa vesa pin sën ham malamin nesepa lo, banon jaḵ nivesa. ¹²Nebë sënë in bë ham huk pin geḵo hil Mehöböp Yesu Kerisi arë jaḵ na vavunë log hil Anutu luho Mehöböp Yesu Kerisi degevonḡ hir semusemu vu ham, bedegeḵo ham arëmin jaḵ geving.

Alam Sën Denekeyëh Horek Lo Rëḵ Detetuhin Ham

2 ¹Arig lo, hil Mehöböp Yesu Kerisi rëḵ nom gökin nah, lob hil rëḵ angupin hil na vu yi, om he bë nanër vu ham nabë ham su kwetul doḵ in ḡaḡek sënë. ²In mehö la rëḵ denanër vu ham nabë Mehöböp yi buk töḵ yam ggovek ya gedenanër nabë nḡaahur ti nër vu sir mederaḵ ni. Ma denanër nabë he kevu ḵapiya nebë saga ya vu sir. Rëḵ ma geham su kwam kwamin in hir ḡaḡek sënë genewamin jaḵ pevis. ³In mehöti rëḵ tetuhin ham, gaḵ buk sënë og su yoh vu bë rëḵ nam meris rë. Gaḵ mëm nabë alam nḡahiseḵë degeḵo sir jaḵ los degeruu demij vu Anutu namuḡin, gemehöti sën rëḵ natu Mehö-keyëhsën-horek-ala lo natöḵ nam rangah geving rë, loḵ mëm. Yiḵ Mehö Nipaya sën rëḵ mala nama doḵ Nyëḡ Nipaya lo. ⁴Mehö sënë og rëḵ ngis begö vu nḡaa pin sën mehönon denenër bë anutu lo los nḡaa pin sën deneḵo raḵ lo, gegeḵo yi jaḵ jaḵ nabë kesuu. Om rëḵ getunḡ yi sëa doḵ na Anutu yi dub böp ayo vabuung genanër nabë yiḵ yi Anutu. ⁵Ma ham kwam virek in ḡaḡek sën sa nado ving ham wirek gesenër vu ham lo?

⁶Log ham raḵ nḡaa sën neggërin aggata in mehö agi gwëbeng-ë ni ving. In yi buk yö nahën, om su yoh vu bë natöḵ nam rangah rë. ⁷Yönon, Mehö-keyëhsën-horek-ala medo nevonḡ huk gwëbeng menedo, rëḵ mu nahën neggëp vunsën beyö rëḵ gëp nabë saga bena berup doḵ yi buk. In Mehö ti nahën neggërin yi aggata gwëbeng, rëḵ mu getahin bër ⁸og mëm Mehö-keyëhsën-horek-ala rëḵ natöḵ nam rangah. Lob Mehöböp Yesu Kerisi rëḵ ngis yi jaḵ avi rasap menadiiḵ. Log Mehöböp mëm rëḵ natöḵ nam rangah los niḵapiik böpata, lob niḵapiik sënë rëḵ kevoh Mehö-keyëhsën-horek-ala bemala nama na veröḵ yi. ⁹Mehö-keyëhsën-horek-ala sënë natöḵ nam rangah, og rëḵ nam los Satan yi niwëëk begevong nḡaa böp böp los niwëëk, gehuk aggagga in tetuhin hil. ¹⁰Rëḵ gevong nḡaa nipaya aggagga pin in gekuungin alam sën vonḡin malaj nama lo. Bë ahëj geving ḡaḡek anon medegevonḡ geving, og yoh vu bë geḵo sir nom vu Anutu, rëḵ mu ma om rëḵ malaj nama. ¹¹Su deḵo Anutu yi ḡaḡek anon rë, om Anutu rëḵ dëëin sir lob ḡaḡek kuungsën los niwëëk nam in tetuhin sir medegevonḡ geving ḡaḡek sën anon ma lo. ¹²In alam pin sën

su denevong ving gagek anon agi re geyo denevong ahij nivesa in ngaa nipaya mu lo degeko nipaya nyevewen dok nah bemalaj nama.

Anutu Ggoin Ham Raḵ Bē Rēḵ Geḵo Ham Nom

¹³Rēḵ mu arig lo, huk neggēp vu he bē he najom jaḵ los ahēmin nivesa vu Anutu in ham noh vu buk. In Anutu ahē neving ham beggoin ham raḵ vu nyēdahis vorot in bē Anon Vabuung gevong beham ayomin nirōp jaḵ. Lob ham gwevong geving gagek anon, loḵ mēm geḵo ham nom vu Anutu. ¹⁴Vongin bē ham gweḵo hil Mehōbōp Yesu Kerisi niḵapiik los arē bōp nōk vu ham geving, om vong behe haḵo Bengō Nivesa yōk vu ham in bē tahi ham nom vu yi. ¹⁵Nebē sēnē, om arig lo, ham ngo bare nimin wēēk, beham sepa dok Anutu yi gagek pin sēn he nēr vu ham ggēp avimin los kevu loḵ ḵapiya lo. ¹⁶Lob hil Mehōbōp Yesu Kerisi luho hil Amad Anutu sēn ahēj neving hil lo devong behil ayod sepēp raḵ berēḵ gēp nabē sēnē degwata. Vong semusemu vu hil nyēmasēn in bē hil ajaḵ ni nabē rēḵ geḵo hil nah vu yi yōnon, om hil medo navo kwad in. ¹⁷Om sa neḵetaḡ in ham bē luho degevong beham ayomin sepēp jaḵ gedegevong nij wēēk vu ham in ham nanēr ngaa los gwevong ngaa nivesa mu.

Ham Najom Jaḵ Vu Anutu Nabē Dok Vu He

3 ¹Log arig lo, he hōmin gagek ti nahēn neggēp nebē: Ham najom jaḵ vu Anutu nabē dok vu he in Mehōbōp yi gagek serōḡ mena menoh vu nyēḡ pin, balam pin degeko jaḵ pevis barē bōp jaḵ nabē sēn ham aga. ²Log ham najom jaḵ vu Anutu nabē bo he vēr in alam sēn nij paya los su nij rōp rē lo nemaj, in ham raḵ ni bē alam ngahiseḵē su ayoj neya timu vu Anutu rē. ³Rēḵ mu Mehōbōp og su mehō kwa luu rē, gaḵ rēḵ gevong niwēēk vu ham jaḵ buk los geḡin ham in Satan. ⁴Log Mehōbōp tateḵin he kwamin behe raḵ ham nimin bē ham medo nevong ngaa pin sēn he nēr vu ham lo gwēbeng menedo, geham rēḵ medo gwevong nabē saga rot geving. ⁵Om Mehōbōp bē ham kwamin in ham kwamin bo nabē Anutu ahē neving ham, lob gevong beham bare mekwerē maggin los ayomin niwēēk nabē sēn Kerisi nevong lo.

Alam Pin Denajom Huk Noh Vu Sir

⁶Log arig lo, hil atu Mehōbōp Yesu Kerisi yi alam, om he vo horek vu ham banēr niwēēk bē: Ham gwetah ham in arimin vahi sēn nij tebō gesu denevong huk rē lo, in sagaḵ su denesepa loḵ gagek sēn he nēr vu ham lo rē. ⁷Gaḵ ham sepa dok he vahamin, in ham ngo raḵ ni bē wirek sēn he nado ving ham lo, og he su nahēp sehēb rē. ⁸Lob he su haḵo ham nos lu ngaa meris rē. Gaḵ he nebaḡo, gehe nehevong huk niwēēk rot menavimengin buk gerangah, in bē he su abo maggin vu ham. ⁹He yoh vu bē gaḵo ham nos lu ngaa, rēḵ ma gehe nehevong nebē sēnē in bē ham

gwelë besepa doḵ he vahamin. ¹⁰He nado ving ham wirek, lob he vo horek vu ham nebë sënë bë: Mehöti bë ni tebö in huk megëp sehëb, og ham su bo nos vu yi. ¹¹Rëḵ mu he hanḡo ḡaḡek bë ham vahi deneggëp sehëb gesu denevonḡ huk ti rë, ḡaḡ yö medo deneraḵ nij in mehö ngwë hir nḡaa. ¹²He tu Mehöböp Yesu Kerisi yi hur om sën he vo horek vu alam nebë saga bahee vu sir bë degevonḡ huk nivesa bedemedo gedeḡeḡo monë jaḵ, bemëm debaḡo yö hir nos jaḵ medeḡa niröp.

¹³Log arig lo, ham su nimin tebö in huk nivesa, ḡaḡ ham medo gwevonḡ noh vu buk. ¹⁴Rëḵ mu nabë mehöti su sepa doḵ ḡaḡek pin sën he ḵevu loḵ ḵapiya agi rë, og ham nḡo jaḵ mehö saga ni nivesa, beham nḡo medo ading in yi. Lob mëm rëḵ ni namum in yi nḡaa sën nevonḡ lo begërin yi. ¹⁵Rëḵ mu ham su gwelë mehö sënë paya rot, ḡaḡ ham kwamin bo nabë ham arimin rëḵ nevonḡ paya, om ham bo kwa nivesa vu yi.

Paulus Semu ḡaḡek Hus

¹⁶Hil Mehöböp sën ayo neggëp revuh lo gevonḡ beham ayomin ḡëp revuh in nḡaa pin sën töḵ vu ham lo, begëp noh vu buk pin. Log Mehöböp medo geving ham pin.

¹⁷Sa Paulus sënë, senḡo kwaḡ nevo ham bemëm sa ḵevu ḡaḡek dus ti sënë raḵ senḡo nemaḡ yoh vu sën sa nehevonḡ loḵ sa ḵapiya pin lo, in bë ham jaḵ ni nabë senḡo ḵevu yönon.

¹⁸Hil Mehöböp Yesu Kerisi yi semusemu medo geving ham pin.